

# ILIDŽA



INFORMATIVNI BILTEN  
OPĆINE ILIDŽA

BROJ 199  
APRIL 2023.



Kanalizacija  
u Butmiru



Obnova  
premjera



Centralni  
trg Ilidža



# SADRŽAJ

<b>Nova fasada za ljepši izgled Otesa</b> Projekt "Za novo lice Ilidže"	4
<b>Obilježen Dan nezavisnosti Bosne i Hercegovine</b> Svečana sjednica Općinskog vijeća Ilidža	6
<b>Učenicima i studentima uručeno 585 stipendija</b> U Multifunktionalnoj sali Općine Ilidža	7
<b>Butmir dobija veliki sportsko-zabavni park</b> 20. redovna sjednica Općinskog vijeća Ilidža	8
<b>Načelnici općina KS održali radni sastanak</b> Na poziv načelnika Općine Trnovo	10
<b>Sedma godišnjica od ubistva Dženana Memića</b> Porodica još traga za istinom i pravdom	10
<b>Proljetna akcija čišćenja Stojčevca</b> Održavanje poznatog izletišta	11
<b>Uskoro nova rasvjeta u Velikoj aleji</b> Dodatno uređenje najposjećenijeg dijela općine Ilidža	12
<b>Izložba fotografija Ukradeno djetinjstvo</b> Srednjoškolci izlagali u prostorijama Općine Ilidža	14
<b>Nagrade i zahvalnice za GSS Ilidža i FUCZ</b> Dio bh. tima koji je učestvovao u spašavanju	16
<b>Utvrđena obala Dobrinja, očišćen Rakovički potok</b> Održavanje vodotoka na području općine Ilidža	17
<b>Mobilna učionica za romsku djecu</b> Privremeni alternativni smještaj za romske porodice u Rakovici	18
<b>Obnovljen potputnjak i postavljena nova rasvjeta</b> Saradnja Općine Ilidža i IOM-a	18



4 str.

**Gradi se kanalizaciona mreža u naselju Butmir**



12 str.

**Edin Bavčić i KK Champion dobitnici Zlatne plakete Općine Ilidža**



14 str.

**Slijedi aviosnimanje KO Hrasnica i KO Butmir**



19 str.

**Mijenja se izgled Ilidže: Počelo popločavanje Centralnog trga**

## IMPRESSUM

Izdavač: **Općina Ilidža**  
Butmirska cesta 12  
71210 Ilidža  
info.desk@opcina-ilidza.ba  
+38733775600

Pripremili: **Dino Stambolić**  
**Medina Aganspahić**  
(lice na stručnom osposobljavanju)

DTP: **Dino Stambolić**

Štampa:  
**Printologija**

Tiraž: **2.500**



[www.opcina-ilidza.ba](http://www.opcina-ilidza.ba)





## RIJEČ NAČELNIKA

Iako je iza nas zimski period, u kojem građevinski radovi uglavnom miruju, već u prvim mjesecima 2023. godine uspjeli smo započeti radove na nekoliko izuzetno važnih kapitalnih infrastrukturnih projekata milionskih vrijednosti.

Projekti koji se tiču vodovodne i kanalizacione mreže visoko su na listi naših prioriteta. Jedan od projekata koje smo pokrenuli s početkom ove kalendarske godine je rekonstrukcija 40 godina stare kanalizacije u naselju Butmir. Kroz prvu fazu radova vrijednih više od 1,5 milion KM bit će obuhvaćene ulice Ilirska, Izeta Čomare, kao i dijelovi ulica Butmirske ceste i Plavog puta.

Kada je riječ o projektima vodosnabdijevanja počeli su radovi na pumpnoj stanici Blažuj, a po završetku radova ova pumpna stanica će u budućnosti značajno olakšati i poboljšati vodoopskrbu za domaćinstva u ovom dijelu naše Ilidže. Od nove pumpne stanice neće profitirati samo domaćinstva u mjesnim zajednicama Blažuj i Osjek, već će ona napajati i kompletno područje RP Riverina-Sastavci, ali i Ahatoviće i Dobroševiče, naselja koja se nalaze na teritoriji općine Novi Grad.

Poslije uklanjanja svega što je narušavalo izgled budućeg Centralnog trga na Ilidži, a potom i detaljne pripreme samog terena za finalne radove, počelo je i popločavanje prostora između Prve osnovne škole i Četvrte gimnazije, za koji vjerujem da će u potpunosti promijeniti izgled Ilidže, a novi trg će biti jedan od najljepših i najvećih u Kantonu Sarajevo ali i Bosni i Hercegovini. Bit će baš onakav kakav je Ilidži nedostajao, a koja ga itekako zaslužuje.

Uprkos što nas tek očekuje početak nove građevinske sezone, ponosan sam što smo obnovom pojedinih ilidžanskih saobraćajnica uspjeli totalno preobraziti izgled pojedinih naselja ili njihovih dijelova i našim sugrađanima podariti kvalitetnije uslove za normalniji život.

Nastojimo i da kroz saradnju s višim nivoima vlasti, ali i međunarodnim organizacijama ostvarimo određene infrastrukturne pomake od kojih će građani imati najviše koristi.

I dok brinemo o uličnoj rasvjeti, potputnjacima, čišćenju korita, uređenju zelenih površina, označavanju planinarskih staza na Igmanu, ne smijemo zaboraviti da uspješno nastavljamo s obnovom premjera aviosnimanjem. Ove godine slijedi snimanje katastarskih općina Hrasnica i Butmir, a ovaj historijski projekt, koji je počeo krajem 2021. godine, u budućnosti će donijeti brojne benefite stanovnicima naše lokalne zajednice.

Ponosno kažem da nastavljamo biti podrška mladima, učenicima i studentima, kako kroz stipendije, tako i kroz zanimljive javne pozive za pokretanje novih poslovnih ideja. Naravno, ne zanemarujemo ni one najstarije u našoj zajednici,

obišli smo ih i posjetili nedavno i uručili simbolične poklone, a brinemo i o onim najugroženijim kategorijama.

Pazimo na naše osnovce, na njihova takmičenja, na njihove obavezne časove plivanja, a jednako su nam važni naši srednjoškolci, čiju smo izložbu ugostili u prostorijama Općine Ilidža.

Važne su nam i naše komšije Romi, prema kojima nastojimo pokazati maksimalnu empatiju, a želja nam je njihovoj djeci pružiti približne uslove u kakvima uče i rade sva druga djeca. Zbog toga smo nedavno u privremenom alternativnom smještaju u Rakovici postavili mobilnu učionicu kao poseban prostor za pripremu za školu, dok smo istovremeno za sve osigurali priključke na energetska mrežu.

U svim programima i projektima koje sprovodimo i realizujemo vidimo šansu za sve nas kako bi našu Ilidžu učinili što ugodnijim i normalnijim mjestom za život za sve njene stanovnike, ali i one koji je kao turisti odluče posjetiti.

Upravo preko turista o Ilidži u svijet želimo poslati najbolju moguću sliku. Iskreno se nadam da će predan rad i zajednički angažman svih nas u narednom periodu, a uz vašu podršku, biti dovoljan da naslikamo sliku Ilidže kakvu zamišljamo, kojoj će se svi diviti.

Potencijali s kojima naša lokalna zajednica raspolaže, kako prirodni, tako i privredni i ljudski su veliki, no neophodno je znati iskoristiti ih na pravi način.

Mnoge stvari koje su u prošlosti bile nezamislive uspjeli smo pomjeriti s mrtve tačke i dokazati da su promjene moguće, a nadam se da ćemo već ovoga ljeta nastaviti pomjerati granice.

Spremni su novi projekti za Ilidžu, dom dobrih ljudi!



S početkom 2023. godine krenula realizacija projekta čija ukupna vrijednost premašuje 1,5 miliona KM

## GRADI SE KANALIZACIONA MREŽA U BUTMIRU



Kroz prvu fazu bit će urađeno 1.041 metara fekalne kanalizacije

Na startu 2023. godine, pripremom terena, Općina Ilidža počela je s radovima na izgradnji nove separatne kanalizacione mreže u naselju Butmir, čija je realizacija najavljena u ovoj godini.

- Obnova kanalizacione mreže, koja je stara desetinama godina, bila je glavni prioritet stanovnika MZ Butmir u proteklom periodu, a kao takvog smo ga i uvrstili među najvažnije kapitalne infrastrukturne projekte - kazao je načelnik Nermin Muzur.

Prvom fazom izgradnje nove separatne kanalizacione mreže čija vrijednost premašuje 1,5 miliona KM bit će obuhvaćene ulice Ilirska, Izeta Čomare, kao i dijelovi ulica Butmirska cesta i Plavi put. Kroz ovu fazu radova bit će izgrađeno 1.041 metara kanalizacije za fekalne i 1.354 metara za oborinske vode.

- Bez obzira na to što je građevinska sezona završena, uz povoljne vremenske uslove odlučno nastavljamo raditi na poboljšanju i izgradnji infrastrukture koja će koristiti našim građanima - poručio je Muzur.

Krajem prošle godine Općina Ilidža je prije roka završila prvu fazu izgradnje glavnog kanalizacionog kolektora za Rakovicu.

Proces modernizacije i unapređenja ekonomske i ekološke efikasnosti na području općine Ilidža

## ILIDŽANSKE ULICE DOBILE LED RASVJETU

U 2023. godini Općina Ilidža nastavila je s projektom zamjene dotrajale ulične rasvjete i instaliranjem novih rasvjetnih tijela.

Značajan broj ulica u svih 16 mjesnih zajednica Općine Ilidža dobilo je novu LED rasvjetu, a ovaj projekt nastavljen je i u 2023. godini. Novu LED rasvjetu dobile su ulice Samira Čatovića Kobre i Magistrala.

- Nastojali smo u svakoj mjesnoj zajednici u nekoliko ulica instalirati LED rasvjetu. Tamo gdje smo stali 2022. nastavljamo u 2023. - kazao je načelnik Općine Ilidža, Nermin Muzur, dodavši:

- Električnu energiju želimo koristiti na što efikasniji i racionalniji način, ali i doprinijeti sigurnosti naših građana.



Led rasvjeta u ulici Samira Čatovića Kobre

Projekt "Za novo lice Ilidže" koji sprovodi Općina Ilidža pokazao se kao itekako uspješan

## NOVA FASADA ZA LJEPŠI IZGLED OTESA

Implementacija projekta utopljanja stambenih zgrada za kolektivno stanovanje na području općine Ilidža u saradnji s građanima nastavljena je i u 2023. godini. Posve novi izgled dobila je zgrada u ulici Barska, u Mjesnoj zajednici Otes.

"Za novo lice Ilidže" jedan je od projekata koje sprovodi Općina, a koji u potpunosti opravdava svoj naziv. Ovim projektom Općina nastoji smanjiti troškove grijanja, ali i unaprijediti energetske efikasnost objekata, kao i produžiti životni vijek nekretninama.

- Sa završetkom radova na utopljanju zgrade u Otesu, ali i sa svim ranije utopljenim objektima, područje općine Ilidža će zasigurno dobiti moderniji izgled. Ovaj projekt je najbolji pokazatelj da mjere energetske efikasnosti stambenih objekata mogu doprinijeti poboljšanju životnog standarda - kazao je načelnik Općine Ilidža, Nermin Muzur.

U 2022. godini kroz ovaj projekt utopljene su dvije zgrade u ulici Derviš-paše Bajezidagića u Hrasnici, na brojevima 3 i 6, a novu



Objekt kolektivnog stanovanja u ulici Barska

fasadu dobila je i jedna od lamela na zgradi u ulici Ramiza Jašara. Radovi na utopljanju uspješno su realizovani i na zgradi u ulici Dragana Kulidžana u Otesu. Pored ovog projekta, Općina Ilidža je kroz nužne popravke aktivno radila i na saniranju dotrajalih i uništenih krovova na stambenim zgradama, a tokom protekle godine sanirano ih je ukupno četiri.

Pogodnosti za ljubitelje knjige na teritoriji Ilidže

## OPĆINA OMOGUĆILA 400 BESPLATNIH ČLANARINA U BIBLIOTECI SARAJEVO



Želja je animirati što veći broj Ilidžanaca na čitanje

Općina Ilidža svojim građanima i građankama u 2023. godini osigurala je 400 besplatnih članarina u Javnoj ustanovi Biblioteka Sarajevo, čije se Pozajmno odjeljenje Ilidža nalazi u Multimedijalnom centru, na adresi Hrasnička cesta 8.

Iako se nalazimo u vremenu novih tehnologija, digitalizacije i društvenih mreža, Općina Ilidža je kroz besplatne članarine u JU Biblioteka Sarajevo željela animirati što veći broj Ilidžanaca na čitanje.

- Naša je želja da animiramo građane da u što većem broju posjećuju biblioteku koja se nalazi u Multimedijalnom centru Ilidža - izjavio je načelnik Općine Ilidža, Nermin Muzur, te naglasio kako Općina želi unaprijediti kulturu čitanja.

Pravo na učlanjenje u JU Biblioteka Sarajevo (Pozajmno odjeljenje 16) imaju dvije osobe iz iste porodice.

Za besplatno učlanjenje punoljetnim osobama neophodna je lična karta, a maloljetnicima CIPS-ova prijava.

## Nastavak podrške najugroženijim kategorijama



Sredstva su osigurana iz Budžeta Općine Ilidža za 2023. godinu

## OSIGURANE UŽINE ZA 514 OSNOVACA I PRIJEVOZ ZA DJECU S POTEŠKOĆAMA U KRETANJU

Općina Ilidža nastavila je s podrškom najugroženijim kategorijama nakon što je osigurala besplatne dažbe użine za 505 osnovaca s područja općine Ilidža u aktuелnoj školskoj godini, a čije su porodice u stanju socijalne potrebe, kao i za devet učenika s područja Ilidže koji pohađaju Centar za odgoj, obrazovanje i rehabilitaciju "Vladimir Nazor".

Sredstva za ovu namjenu, kao i za projekt sufinansiranja prijevoza 73 učenika s poteškoćama u kretanju za drugo polugodište školske 2022./2023. godine, osigurana su iz Budžeta Općine Ilidže za 2023. godinu.

Trenutni korisnici ovog vida podrške su učenici i njihovi pratioci koji pohađaju Centar za odgoj, obrazovanje i rehabilitaciju "Vladimir Nazor", Centar za slušnu i govornu rehabilitaciju, Centar za slijepu i slabovidnu djecu i omladinu, Škola za srednje stručno obrazovanje i radno osposobljavanje i Zavod za specijalno obrazovanje i odgoj djece "Mjedenica".

Na ovaj način Općina Ilidža je nastavila kontinuirano pružati podršku jednoj od najosjetljivijih kategorija našeg društva, a tako će biti i u budućnosti.

Općina Ilidža nastavila uspješnu saradnju s Olimpijskim bazenom Otoka

## ŠKOLA PLIVANJA ZA UČENIKE ČETVRTIH RAZREDA ILIDŽANSKIH OSNOVNIH ŠKOLA



Škola plivanja za 630 učenika četvrtih razreda

I u 2023. godini Općina Ilidža je nastavila uspješnu saradnju s Olimpijskim bazenom Otoka. Kroz ovu saradnju ilidžanskim

osnovecima bit će omogućeno usavršavanje osnovnih plivačkih tehnika, kao i uspješno realiziranje nastave Tjelesnog i zdravstvenog odgoja.

Sredstva u iznosu 20.000 KM za finansiranje ovog projekta Općina je planirala kroz Budžet za 2023. godinu. Potpisom sporazuma Olimpijski bazen Otoka će organizovati i realizovati projekt prema metodologiji kao i ranijih godina.

Općina Ilidža je u školskoj 2021./2022. godini ovaj oblik nastave osigurala za 618 osnovaca, dok će u aktuелnoj školskoj godini 630 učenika četvrtih razreda pohađati škole plivanja.

U osnovnim školama propisano je pohađanje škole plivanja za sve učenike četvrtih razreda, kao obavezan oblik nastave.

Sjećanje na najvažniji događaj u novijoj historiji naše domovine, 31. godišnjica od Referenduma

# SVEČANOM SJEDNICOM OPĆINSKOG VIJEĆA ILIDŽA OBILJEŽEN DAN NEZAVISNOSTI BIH



Delegacija Općine Ilidža na Centralnom spomen-obilježju poginulim borcima i civilima općine Ilidža

Osim delegacije Općine Ilidža obilježavanju Dana nezavisnosti Bosne i Hercegovine prisustvovali su i predstavnici boračkih udruženja, političkih partija i organizacija s područja općine Ilidža, kao i građani

Povodom 1. marta, Dana nezavisnosti Bosne i Hercegovine, održana je Svečana sjednica Općinskog vijeća Ilidža.

Delegacija Općine Ilidža predvođena načelnikom Nerminom Muzurom, predsjedavajućim Općinskog vijeća Ilidža Tarikom Stambolićem i njegovim zamjenicima Redžom Lemezanom i Selverom Zečirovićem odala je počast šehidima i poginulim borcima polaganjem cvijeća na Spomeniku borcima NOR-a u Velikom parku i Centralnom spomen-obilježju poginulim borcima i civilima općine Ilidža na 31. godišnjicu najvažnijeg događaja u historiji naše zemlje.

Obilježavanju Dana nezavisnosti Bosne i Hercegovine prisustvovali su i predstavnici boračkih udruženja, političkih partija i organizacija s područja općine Ilidža, kao i brojni građani.

Nakon polaganja cvijeća održana je i Svečana sjednica Općinskog vijeća Ilidža na kojoj se prisutnima obratio načelnik Općine Nermin Muzur.

- Na današnji dan, prije 31 godinu, čak 99,7 % građana koji su izašli na referendum, a među kojima su i mnogi od vas, izjasnili su se da žele suverenu i nezavisnu Bosnu i Hercegovinu, državu ravnopravnih građana, naroda BiH - Muslimana, Srba, Hrvata i pripadnika drugih naroda koji u njoj žive, i na tome njima i vama hvala - kazao je načelnik Muzur u obraćanju zvaničama u Multimedijalnoj sali Općine Ilidža, te dodao:



Svečana sjednica OV Ilidža

- Hvala vam i na tome što ste odluku s referenduskog listića, nažalost, morali hrabro i odvažno, braniti vlastitim životima pred mnogo snažnijim i opremljenijim agresorom. Posebno poštovanje i zahvalnost želim iskazati onim najhrabrijim i najiskrenijim koji su svoje živote trajno ugradili u našu slobodu i opstanak Bosne i Hercegovine.

Načelnik Općine Ilidža je na kraju svim građanima BiH uputio čestitke povodom Dana nezavisnosti Bosne i Hercegovine uz riječi prvog predsjednika Predsjedništva Republike Bosne i Hercegovine, rahmetli predsjednika Alije Izetbegovića:

- Mi ćemo nastaviti da se borimo za Bosnu i svoj narod. Mi želimo svoju državu. Jer je narod bez države kao porodica bez krova koja živi pod kišom. Ne želimo biti narod koji nema državu.

Općina Ilidža iskazala opredijeljenost ka jačanju institucija koje su od velike važnosti za naše građane

## VRIJEDNU RAČUNARSKU OPREMU OPĆINA DONIRALA POREZNOJ ISPOSTAVI ILIDŽA



Avdić, Hadžić i Mešak sa vrijednom opremom

Nakon odluke Općinskog vijeća Ilidža, Općina Ilidža je provela nabavku i donirala novu računarsku opremu Poreznoj upravi Federacije Bosne i Hercegovine, odnosno Poreznoj ispostavi Ilidža. Poslije potpisivanja ugovora između načelnika Općine Ilidža Nermina Muzura i šefa Porezne ispostave za općinu

Ilidža i općinu Trnovo Senada Avdića, primopredaja računarske opreme je izvršena u prostorijama Porezne ispostave Ilidža.

Primopredaji vrijedne informatičke opreme, za kojom je Porezna uprava FBiH, tačnije Porezna ispostava Ilidža prethodno iskazala potrebu, prisustvovali su Benjamin Mešak, pomoćnik načelnika Općine Ilidža za finansije i Mirsada Hadžić, rukovodilac Službe za zajedničke poslove.

Iz Porezne ispostave Ilidža iskazali su zahvalnost Općini na razumijevanju i vrijednoj donaciji koja će u budućnosti sasvim sigurno olakšati njihov svakodnevni rad.

Na ovaj način Općina Ilidža je iskazala duboku opredijeljenost ka jačanju institucija koje su od izuzetne važnosti za sve građane naše lokalne zajednice.

Razmotrene su i aktivnosti oko dalje saradnje koja će se nastaviti, a Općina je iskazala spremnost da u budućnosti bude podrška svim sistemima naše države.

### U Multifunkcionalnoj sali Općine Ilidža

## ILIDŽANSKIM UČENICIMA I STUDENTIMA, URUČENO 585 UGOVORA ZA STIPENDIJE

Općina Ilidža uručila je ukupno 585 ugovora za stipendije učenicima osnovnih i srednjih škola, kao i studentima. 373 talentovanih učenika i studenata, koji su ostvarili pravo na stipendiju Općine Ilidža za školsku/akademsku 2022./2023. godinu, potpisali su ugovore u Multifunkcionalnoj sali Općine Ilidža.

Pored stipendija talentovanim učenicima i studentima, Općina Ilidža uručila je i ugovore o stipendiranju 124 učenika i 41 studenta u stanju socijalne potrebe kroz program koji redovno sprovodi Služba za rad, socijalna pitanja, zdravstvo, izbjeglice i raseljena lica.

Ugovore o stipendijama potpisao je i 41 učenik te šest studenata koji su djeca bez oba roditelja ili roditeljskog staranja, čime ukupan broj stipendija dostiže do 585.



Za školsku/akademsku 2022./2023. godinu

Iz kabineta načelnika Općine Ilidža Nermina Muzura naglašeno je kako mladi moraju biti u vrhu liste prioriteta svih lokalnih zajednica ukoliko želimo svjetliju i prosperitetniju budućnost.

## ISMET GODINJAK GOST NAČELNIKA MUZURA



Ismet Godinjak i načelnik Muzur

Načelnik Nermin Muzur ugostio reprezentativca Bosne i Hercegovine u sjedećoj odbojci Ismeta Godinjaka. Ovaj Ilidžanac neizostavan je dio najtrofejnije reprezentativne selekcije naše zemlje od samih njenih početaka, a sa njom je osvojio sve što se moglo osvojiti. Na posljednjem Svjetskom prvenstvu, koje je održano na Ilidži, okitio se srebrenom medaljom.

Godinjak se našao i među ilidžanskim sportistima koje je Općina Ilidža odlučila novčano nagraditi za izvanredne sportske rezultate, no to nije bio jedini razlog posjete načelniku Muzuru.

S predsjednikom Saveza dobitnika najvećih ratnih priznanja "Zlatni ljiljan" i "Zlatna policijska značka" KS načelnik Muzur je razgovarao i o pitanjima vezanim za boračku populaciju, a posebna tema bilo je udruženje čiji je Godinjak predsjednik.

U Multifunkcionalnoj sali Općine Ilidža održana 20. redovna sjednica Općinskog vijeća Ilidža

# BUTMIR DOBIJA VELIKI SPORTSKO - ZABAVNI PARK ZA DJECU I MLADE



Usvojene važne odluke

Na početku sjednice odlukom CIK-a Samir Habota je položio zakletvu čime je preuzeo dužnost novog vijećnika, s obzirom na to da je Samir Avdić, dosadašnji vijećnik i zamjenik predsjedavajućeg Općinskog vijeća, preuzeo mandat u Skupštini Kantona Sarajevo. Za novog zamjenika predsjedavajućeg Općinskog vijeća glasovima većine izabran je Selver Zečirović

Dvadeseta redovna sjednica Općinskog vijeća Ilidža održana je u Multifunkcionalnoj sali Općine Ilidža. Kao prvu tačku dnevnog reda, vijećnice i vijećnici, razmatrali su Odluku o usvajanju izmjene i dopune Regulacionog plana "Butmir", a koja se odnosi na izgradnju zelenih površina uz dječija i rekreativna igrališta te je ona jednoglasno usvojena.

Na osnovu navedenog, stvoreni su preduvjeti da Butmir, nakon godina čekanja, napokon dobije moderni sportsko-zabavni park za djecu i mlade.

Na početku sjednice odlukom Centralne izborne komisije Samir Habota položio je zakletvu čime je preuzeo dužnost novog vijećnika, s obzirom na to da je dosadašnji vijećnik i zamjenik predsjedavajućeg Općinskog vijeća Samir Avdić preuzeo mandat u Skupštini Kantona Sarajevo.

Za novog zamjenika predsjedavajućeg Općinskog vijeća glasovima većine vijećnika izabran je Selver Zečirović.

Također, razmatrane i usvojene su i Odluka o neposrednoj pogodbi za prodaju građevinskog zemljišta u vlasništvu Općine Ilidža Privrednom društvu BH Telecom d.d. Sarajevo, Odluka o preispitivanju rješavanja imovinsko-pravnih odnosa na objektu dvonamjenskog skloništa koji se nalazi u Hrasnici, ulica Šehitluci bb i Odluka o pristupanju izradi izmjena i dopuna Regulacionog plana "Stari Stup" - po skraćenom postupku (stambeno poslovni objekti na građevinskim parcelama "104" i "105").

Općinsko vijeće je jednoglasno usvojilo i Odluku o dodjeli priznanja Općine Ilidža u 2023. godini.

Vijećnicama i vijećnicima je kao informativni materijal dostavljena Informacija o realizaciji Plana mjera na čišćenju i uređenju vodotoka na području općine Ilidža kao i Informacija o aktivnostima Policijske uprave Ilidža, za period januar - decembar 2022. godine.

U ime Policijske uprave Ilidža, informativni materijal o aktivnostima Policijske uprave Ilidža predstavio je komandir İlhan Şabić.

On je istakao izvanrednu saradnju sa Općinom Ilidža te se zahvalio Općinskom načelniku i Općini na saradnji i opremi koja je dodijeljena u proteklom periodu i koja značajno olakšava i unapređuje rad Policijske uprave.



Tarik Stambolić, predsjedavajući OV Ilidža

## Sastanak načelnika organizovao je načelnik Općine Trnovo Ibro Berilo



Hadžibajrić, Muzur i Berilo tokom sastanka u Javorovom dolu

## NAČELNICI OPĆINA KANTONA SARAJEVO ODRŽALI RADNI SASTANAK NA BJELAŠNICI

**Tokom radnog sastanka istaknuto je kako je jedan od većih problema svih lokalnih zajednica provedba Zakona o javnim nabavkama, a složene procedure na kraju usporavaju provedbe budžeta**

Općinski načelnici Kantona Sarajevo, na inicijativu načelnika Općine Trnovo, Ibro Berila održali su sastanak u Javorovom dolu na Bjelašnici, a sastanku je prisustvovao i načelnik Općine Ilidža Nermin Muzur.

Pored općinskih načelnika Trnova i Ilidže, sastanku su prisustvovali načelnik Općine Ilijaš, Akif Fazlić, Općine Stari Grad, Ibrahim Hadžibajrić, Općine Novo Sarajevo, Hasan Tanović, te novoizabrani načelnik Općine Vogošća, Migdad Hasanović.

Tema razgovora bila je dosadašnja saradnja lokalnih zajednica Kantona Sarajevo, kao i njeno unapređenje.

Potreba uvođenja izmjena Zakona o lokalnoj samoupravi koji bi u mnogome olakšao i pojednostavio rad općina, te bi iniciralo izmjenu zakona o pripadnosti javnih prihoda u korist lokalnih zajednica također je bila jedna od tema sastanka.

Načelnici su razgovarali i o donošenju prostorno-planske

dokumentacije, te o proceduralnim problemima prilikom njenog donošenja.

Jedna od tema razgovora bila je i nametanje eksterne revizije donošenjem novog zakona o računovodstvu i reviziji, koji predstavlja još jedan teret na budžete lokalnih zajednica.



Saradnja općina dobila je visoku ocjenu

Tokom radnog sastanka istaknuto je i kako je jedan od većih problema svih lokalnih zajednica provedba Zakona o javnim nabavkama, njegove složene procedure što u konačnici usporava provedbe budžeta i poštivanje rokova realizacije sporazuma sa višim nivoima vlasti.

Na sastanku su razmatrani i zajednički problemi, čija bi rješenja doprinijela dobrobiti građana ovih općina, ali i Kantona Sarajevo.

Općine imaju odličnu saradnju uprkos činjenici da ih vode načelnici iz različitih političkih partija. Interes građana stavljen je ispred interesa politike, a rezultat toga su zajedničke aktivnosti na boljem povezivanju.



Načelnici Ilijaša i Vogošće Akif Fazlić (sredina) i Migdad Hasanović (desno)

Cvijeće na spomen-obilježju Ranjeni kamen, posvećeno rahmetli Dženanu, položila i delegacija Općine Ilidža

## U VELIKOJ ALEJI OBILJEŽENA SEDMA GODIŠNJICA OD UBISTVA DŽENANA MEMIĆA



Porodica Memić već sedam godina traži istinu za svog Dženana

Polaganjem cvijeća i učenjem Fatihe u Velikoj aleji 8. februara 2023. godine je obilježena sedma godišnjica od ubistva Dženana Memića.

Članovi porodice, prijatelji, komšije, poznanici i ljudi željni pravde okupili su se na mjestu gdje je tog nesretnog 8. februara 2016. godine Dženan zadobio povrede od kojih je nakon sedam dana preminuo.

Cvijeće na spomen-obilježju Ranjeni kamen, koje je posvećeno rahmetli Dženanu, položila je i delegacija Općine Ilidža koju je predvodio predsjedavajući Općinskog vijeća Ilidža Tarik Stambolić, a činili su je još dopredsjedavajući Redžo Lemezan i

Selver Zečirović.

Muriz Memić, otac ubijenog Dženana, zahvalio se okupljenim građanima koji su uz njega od prvog dana i koji njemu i njegovoj porodici pružaju podršku u borbi za istinu.

Memić je naglasio da se njegova borba nastavlja, a najavio je i nove proteste koji bi se prema njegovim riječima trebali desiti na proljeće.

Na kraju obilježavanja tužne godišnjice Zejd Šoto, poznati bosanskohercegovački interpretator duhovne muzike, izveo je pjesmu koju je napisao i posvetio ubijenom Dženanu Memiću.

**Općina Ilidža kroz grant vjerskim zajednicama već redovito izdvaja sredstva za podršku ilidžanskim džematima**

## NAČELNIK MUZUR I MUFTIJA GRABUS RAZGOVARALI O ZAJEDNIČKIM PROJEKTIMA

Načelnik Općine Ilidža Nermin Muzur je posjetio prostorije Muftijstva sarajevskog gdje ga je ugostio muftija sarajevski prof. dr. Nedžad Grabus.

U ugodnoj atmosferi načelnik Muzur i muftija Grabus razgovarali su o potencijalnim zajedničkim projektima koji su bitni za lokalnu zajednicu, ali i Muftijstvo sarajevsko.

Općina Ilidža kroz grant vjerskim zajednicama već redovito izdvaja sredstva za podršku džematima na području naše lokalne zajednice, kao i drugima zajednicama koje su u potrebi a koje se ne nalaze na Ilidži.

Muftija sarajevski prof. dr. Nedžad Grabus zahvalio se načelniku Muzuru na posjeti i Općini Ilidža na podršci i iskazao spremnost na saradnju i angažman na budućim zajedničkim projektima.



Posjeta načelnika Ilidže Muftijstvu sarajevskom

Kroz zajednički projekt Općine Ilidža, Vlade Kantona Sarajevo i KJP Sarajevo-šume

## POSTAVLJENE INFO TABLE I HLADNJACI



Novi sadržaji na planini Igman

Planinarske staze na Igmanu, koje vode ka Hrasničkom stanu, dobile novu markaciju, a uređene su i dvije staze koje se sastaju na lokaciji Dugi laz.

Osim markiranih staza do Hrasničkog stana, uz staze su postavljene nove informativne table, koje svjedoče o ulozi planine Igman tokom agresije na Bosnu i Hercegovinu.

Uz info table na stazama su montirani i hladnjaci, kao i mobilijar, a novi koristan sadržaj planina Igman je dobila zahvaljujući odličnoj međusobnoj saradnji Općine Ilidža, Vlade Kantona Sarajevo i KJP Sarajevo-šume.

Pored mjesta za predah i odmor svi posjetioci Igmana moći će saznati mnogo toga o svemu što se u periodu između 1992. i 1995. godine dešavalo na ovoj olimpijskoj ljepotici.

Nadati se da će uređene i markirane staze probuditi interes kod mlađih generacija za ovu planinu koja je bila žila kucavica za Sarajevo tokom četverogodišnje opsade.

### Briga o izvornom stanju najpoznatijeg drvoreda u BiH



Prirodni biser na području općine Ilidža

## VELIKA ALEJA BOGATIJA ZA 52 MLADA STABLA JAVOROLISNOG PLATANA

U Velikoj aleji prema Vrelu Bosne zasađena su 52 mlada stabla javorolisnog platana.

- Ovo je tek početak realizacije planiranog na lokalitetu Vrela Bosne i Stojčevca za ovu godinu - kazao je načelnik Općine Ilidža Nermin Muzur.

Načelnik je uputio čestitke Asadu Jeleškoviću, direktoru Kantonalne javne ustanove za zaštićena prirodna područja Sarajevo, na realizovanoj akciji.

Istovremeno, načelnik je najavio kako će u narednoj sedmici uslijediti novi zajednički radovi Općine Ilidža i KJU za zaštićena prirodna područja Sarajevo.

Inače, Velika aleja sastoji se od dva drvoreda, kestena s vanjske i javorolisnog platana s unutrašnje strane s ukupno 1326 stabala. Prva sadnja stabala u Velikoj aleji izvršena je u periodu između 1888. i 1892. godine, a proteklih godina stabla su uklanjana iz sanacionih i sigurnosnih razloga.

Sadnjom novih stabala jasna je želja da se očuva izvorno stanje ovog prirodnog bisera na području općine Ilidža.

### Briga o biseru podno planine Igman

## PROLJETNA AKCIJA ČIŠĆENJA STOJČEVCA



Uređenje šetnica i zelenih površina

Kroz dvodnevnu akciju čišćenja, u kojoj su učestvovali zaposlenici JP Ilidža, KJU za zaštićena područja Sarajevo, KJKP Park i povjerenici Službe civilne zaštite Općine Ilidža, uređen je veliki dio zelenih površina na izletištu Stojčevac.

- Sve što smo zajedničkim naporima u protekloj godini napravili na Stojčevcu dužnost nam je održavati i u budućnosti. Sada svakodnevno brojni posjetioci bisera podno Igmana mogu uživati u promjenama koje su itekako vidljive - rekao je načelnik Općine Ilidža, Nermin Muzur.

Proljetno uređenje šetnica i zelenih površina, prikupljanje smeća i lišća te obrezivanje stabala tek je dio aktivnosti koje su provedene na Stojčevcu.

- U kratkom periodu uspjeli smo u potpunosti preobraziti Stojčevac, što su prepoznali i brojni posjetioci. Ogromnu zahvalnost za sve što radimo na Spomeniku prirode Vrela Bosne dugujemo načelniku Općine Ilidža Nerminu Muzuru kao i zastupniku u Skupštini Kantona Sarajevo Elvisu Vreti, koji je i jedan od začetnika priče o revitalizaciji Stojčevca - kazao je Asad Jelešković, direktor KJU za zaštićena prirodna područja.

Svečanom sjednicom Općinskog vijeća Ilidža obilježen 12. mart - Dan Općine Ilidža

## EDIN BAVČIĆ I KARATE KLUB CHAMPION DOBITNICI ZLATNE PLAKETE OPĆINE ILIDŽA



Načelnik Muzur i Edin Bavčić, bivši košarkaški reprezentativac BiH

**Prije početka Svečane sjednice Općinskog vijeća Ilidža brojne delegacije položile su cvijeće na Spomeniku borcima NOR-a i Centralnom spomen-obilježju poginulim borcima i civilima općine Ilidža**

Svečanom sjednicom Općinskog vijeća Ilidža obilježen je Dan Općine Ilidža - 12. mart. Na ovaj važan datum, prije 27 godina, desila se reintegracija Ilidže koja je dogovorena Dejtonskim mirovnim sporazumom.

Prije početka Svečane sjednice OV Ilidža brojne delegacije položile su cvijeće na Spomeniku borcima NOR-a i na Centralnom spomen-obilježju poginulim borcima i civilima općine Ilidža. Delegaciju Općine Ilidža u kojoj su bili predsjedavajući Općinskog vijeća Tarik Stambolić i dopredsjedavajući Redžo Lemezan i Selver Zečirović predvodio je načelnik Nermin Muzur.

Učenjem Fatihe i minutom šutnje brojne delegacije svih nivoa vlasti, organizacije, boračka udruženja i političke partije odale su počast poginulim tokom agresije na Bosnu i Hercegovinu, ali i onima koji su svoje živote položili za vrijeme Drugog svjetskog rata.



Predsjedavajući OV Tarik Stambolić i Suada Hadžović

- Kolege iz rukovodstva Općinskog vijeća i ja nismo imali dovoljno godina da tokom agresije na Bosnu i Hercegovinu branimo našu zemlju. Ipak, zbog onoga što nam je ostavljeno u amanet moram reći da ćemo zbog onih koji su svoje živote dali u odbrani naše domovine, naše Ilidže, s posebnim ponosom



Dopredsjedavajući OV Ilidža, Selver Zečirović

obilježavati ovaj izuzetno važan dan u historiji naše lokalne zajednice - rekao je u svom obraćanju na Svečanoj sjednici dopredsjedavajući OV Ilidža Redžo Lemezan, nakon što je predsjedavajući Stambolić prethodno pozdravio sve prisutne i tako otvorio Svečanu sjednicu.

Prije nego se prisutnim zvanicama i gostima obratio i načelnik Muzur, kroz video u trajanju od nekoliko minuta predstavljeni su brojni projekti koji su realizovani ili je njihova realizacija u toku, što je potvrdilo opredjeljenje za razvoj ove lokalne zajednice.

Uz iznesene brojke koju Ilidžu po više osnova svrstavaju u sami vrh u našoj zemlji, načelnik Općine Ilidža Nermin Muzur je kazao kako se pored trenutnih kapitalnih projekata koji se realiziraju, planiraju i novi poput žičare iz Hrasnice ka Igmanu, ali i najveći



investicijski potencijal na ovim prostorima, projekat "Nova Ilidža", koji će sasvim sigurno biti nešto što do sada nije viđeno na Balkanu.

- Sve što radimo nije slučajno i dio je Strategije razvoja Općine Ilidža za period 2022. - 2027. godina. U protekloj godini izvršenje Budžeta je bilo oko 70% i nastavljamo raditi i graditi kako bi pozicionirali Ilidžu tamo gdje i pripada - u samom vrhu - rekao je načelnik Općine Ilidže, koji se zahvalio svojim saradnicima, općinskoj administraciji ali i ilidžanskim privrednicima te dodao:

- I ovaj put dodjeljujemo nagrade najboljim i najuspješnijim, a naša najveća nagrada su svakodnevne poruke građana i pozitivne povratne informacije naših privrednika i raduje nas što je prepoznato naše nastojanje i opredjeljenje da zajedno razvijamo našu lokalnu zajednicu.



Dopredsjedavajući OV Ilidža, Redžo Lemezan

Kao i svake godine povodom Dana Općine uručene su zahvalnice, plakete i povelje. Zahvalnice su dobili Škola fudbala Šampion, KUD "Ekrem Mujkić", fudbaler Asmir Suljić, a zahvalnica je posthumno dodijeljena majoru Hamidu Dupovcu.

Plakete odbrane, za izuzetnu požrtvovanost i značajan doprinos u odbrani zemlje, dobili su Muharem Hot i Sead Vreto, dok su posthumno dodijeljene Zaimu Bešoviću i Nedimu Veispahiću. Kolektivnu plaketu odbrane dobio je Treći motorizovani bataljon IV viteške motorizovane brigade.

Povelja počasni građanin pripala je prof. dr. Fahrudinu Smajloviću, a posthumno ju je dobio Alija Gadžo. Suada Hadžović dobila je povelju za životno djelo. Isto priznanje posthumno je dobila i Azreta Grebović.

Udruženje antifašista i boraca Narodnooslobodilačkog rata - Ilidža dobitnik je srebrene plakete, a zlatna je pripala Karate klubu Champion.

Zlatnu plaketu bivšem košarkaškom reprezentativcu BiH Edinu Bavčić uručio je načelnik Općine Ilidža Nermin Muzur.



Svi dobitnici priznanja Općine Ilidža za 2023. godinu

## FOTOGALERIJA



**Ukupna vrijednost potpisanog ugovora iznosi blizu 900.000 KM**

## KORAK DALJE U OBNOVI PREMJERA, SLIJEDI AVIOSNIMANJE KO HRASNICA I KO BUTMIR



Podaci za KO Vlakovo uskoro u službenoj upotrebi

Nakon okončanog avionskog snimanja katastarskih općina Vlakovo, Osjek, Blažuj, potpisom ugovora s Federalnom upravom za geodetske i imovinsko-pravne poslove i konzorcijem Geobiro Konjic i Geodet Sarajevo, Općina Ilidža napravila je novi korak u realizaciji historijskog projekta obnove premjera na području naše općine.

- S obzirom na to da su radovi na obnovi premjera KO Vlakovo završeni, dobiveni podaci će već u maju ove godine biti u službenoj upotrebi, što predstavlja jednu potpuno novu vrijednost i potpuno novi način evidencije o nekretninama -

kazao je načelnik Općine Ilidža Nermin Muzur nakon potpisa ugovora.

Pored navedenog finalizirat će se radovi za područje KO Osjek i KO Blažuj, a već od ove jeseni, u roku od mjesec dana, bit će realizovano avionsko snimanje KO Hrasnica i KO Butmir. Ukupna vrijednost ugovora koji je potpisan iznosi blizu 900.000 KM.

- Na ovaj način jasno pokazujemo i potvrđujemo našu opredijeljenost da imamo usklađene podatke za adekvatnije prostorno planiranje, bolje upravljanjem građevinskim zemljištem i drugim resursima lokalne zajednice - dodao je Muzur.

Podsjećanja radi, nakon temeljitih priprema, uspostavljanja pravnog okvira i definisanih zadataka, obnova premjera aviosnimanjem na području općine Ilidža počela je 24. decembra 2021. godine, snimanjem katastarske općine Vlakovo. Nakon KO Vlakovo obnova premjera aviosnimanjem nastavljena u katastarskim općinama Osjek i Blažuj.

Ovaj historijski projekt će na kraju iznjedrati Katastar nekretnina, tačnu i jedinstvenu evidenciju o nekretninama, prvu takve vrste u FBiH još od 80-ih godina prošlog stoljeća i prvu u historiji Ilidže.

**Učestvovalo 57 učenika osmih i devetih iz 11 osnovnih škola s područja Ilidže**

## ZAVRŠENO OPĆINSKO TAKMIČENJE IZ FIZIKE

Općinsko takmičenje učenika osnovnih škola s područja općine Ilidža iz nastavnog predmeta Fizika održano je 5. aprila 2023. godine.

Domaćin ovog takmičenja ilidžanskih osnovaca bila je Četvrta osnovna škola, a na njemu je učestvovalo 57 učenika osmih i devetih iz 11 osnovnih škola s područja Ilidže.

Prvo mjesto na takmičenju osmih razreda zauzeo je Ilhan Suljević učenik Osme osnovne škole "Amer Čenanović". Drugo mjesto pripalo je Nejli Voloder (Druga osnovna škola), a treću poziciju zauzela je Amina Baždar (Peta osnovna škola).

U kategoriji devetih razreda prvo mjesto osvojio je učenik Pete osnovne škole Abdullah Muslić. Hanan Čorbo (Druga osnovna škola) je bila drugoplasirana, a treći Aram Šabaredžović (Osma osnovna škola "Amer Čenanović").

Zahvaljujući plasmanu na općinskom takmičenju po troje najboljih učenika izborili su pravo nastupa na kantonalnom takmičenju.

Naredna takmičenja održat će se u aprilu, kada će učenici imati priliku da pokažu svoje znanje iz nastavnih predmeta Tehnička kultura i Historija Bosne i Hercegovine.

**Dodatno uređenje najposjećenijeg dijela općine Ilidža i podizanje nivoa sigurnosti građana**

## VELIKA ALEJA ĆE DOBITI NOVU RASVJETU



Uskoro nove lampe

Velika aleja uskoro će cijelom dužinom dobiti novu rasvjetu. Osim instalacije novih lampi, planirana je i sanacija, odnosno zamjena, sajli koje ih drže.

- Kroz instaliranje nove rasvjete želja nam je dodatno urediti najposjećeniji dio naše lokalne zajednice, kao i podići nivo kada je riječ o segmentu sigurnosti - kazao je načelnik Općine Ilidža Nermin Muzur.

Sredinom marta ove godine u Velikoj aleji zasađene su 52 mlade sadnice javorolisnog platana, dok je krajem prošle godine Općina Ilidža na početku najpoznatijeg drvoreda u Bosni i Hercegovini izgradila Street workout park, kako bi svima koji treniraju ili se rekreiraju na ovoj poznatoj destinaciji osigurali dodatne sadržaje za trening.

Srednjoškolci izlagali u prostorijama Općine Ilidža

## IZLOŽBA FOTOGRAFIJA 'UKRAĐENO DJETINJSTVO'

Povodom Dana Općine Ilidža u prostorijama Općine Ilidža 13. marta održana je izložba fotografija učenika IV-4 odjeljenja Srednje tehničke škole grafičkih tehnologija, dizajna i multimedije. Izložba naziva "Ukradeno djetinjstvo" imala je za cilj podizanje svijesti o problemu nasilja nad djecom, ali i realističan



Načelnik Muzur otvorio je izložbu

prikaz kroz umjetnički izričaj o tome kako žive djeca u izbjegličkim kampovima i romskim naseljima, te kakav je život djece s posebnim potrebama i svakodnevnica svih drugih socijalno ugroženih skupina djece u Bosni i Hercegovini.



Predsjedavajući OV Ilidža Tarik Stambolić obišao izložbu

Izložbu je uz prigodan govor otvorio načelnik Općine Ilidža Nermin Muzur, kazavši da će ovakvi projekti uvijek imati podršku, a posebice tema koju su odlučili obraditi učenici Srednje tehničke škole grafičkih tehnologija, dizajna i multimedije.



Selver Zečirović, dopredsjedavajući OV Ilidža

Otvaranju izložbe prethodio je muzički dio programa u kojem su učestvovali učenici Osnovne muzičke škole Ilidža i njihovi profesori, a nastupio je i bh. kantautor Latif Močević.

Izložbu su posjetili i predsjedavajući Općinskog vijeća Ilidža Tarik Stambolić, kao i njegovi zamjenici Redžo Lemezan i Selver Zečirović.

Iz nastavnog predmeta Tjelesni i zdravstveni odgoj

## ODRŽANO OPĆINSKO TAKMIČENJE U ODBOJCI



Učestvovalo ukupno 256 učenika

Trodnevno Općinsko takmičenje iz nastavnog predmeta Tjelesni i zdravstveni odgoj uspješno je okončano završnim turnirom koji je odigran u Devetoj osnovnoj školi u Rakovici. U finalnom dijelu takmičenja u odbojci nastupile su po tri škole u muškoj i ženskoj konkurenciji.

Pobjednički pehar u konkurenciji djevojčica pripao je učenicama Pete osnovne škole, dok su srebrene medalje završile kod učenica Devete osnovne škole. Trećim mjestom morale su se zadovoljiti učenice Prve osnovne škole.

U konkurenciji dječaka najviše su pokazali učenici Druge osnovne škole. Drugo mjesto osvojila je Peta osnovna škola, dok je OŠ "Mehmed Handžić" zauzela treću poziciju.

Prvi dio takmičenja održan je 23. i 24. marta, a učestvovalo je ukupno 256 djevojčica i dječaka iz svih 12 osnovnih škola s područja općine Ilidža. Deveta osnovna škola bila je domaćin i prvog dijela takmičenja gdje su po tri najbolje ekipe nakon 18 odigranih mečeva izborile plasman na završni turnir.





Dio bosanskohercegovačkog tima koji je učestvovao u spašavanju nakon katastrofalnih zemljotresa u Turskoj

## NAČELNIK MUZUR UGOSTIO GSS ILIDŽA I FUCZ, URUČIO IM NOVČANE NAGRADE I ZAHVALNICE



Načelnik Muzur je bh. spasioce dočekaao i na Međunarodnom aerodromu Sarajevo prilikom povratka iz Turske

Načelnik Općine Ilidža Nermin Muzur ugostio je pripadnike Gorske službe spašavanja Ilidža i članove Federalne uprave civilne zaštite, koji su nedavno boravili u Turskoj, gdje su nakon razornih zemljotresa učestvovali u akcijama spašavanja.

Ovom prilikom načelnik Muzur uručio je prigodne novčane nagrade i zahvalnice za pet članova GSS Ilidža, kao i za sedam pripadnika Federalne uprave civilne zaštite, a čije je prebivalište na području općine Ilidža.

- Ponosni smo što je 12 ljudi, 12 istinskih heroja, s područja naše lokalne zajednice učestvovalo u akcijama potrage i spašavanja preživjelih nakon katastrofalnih zemljotresa koji su pogodili prijateljsku nam Tursku - rekao je načelnik Općine Ilidža, Nermin Muzur, te dodao:

- Ovo je tek mali znak pažnje za njihov angažman, iskazanu

**Iako je većina stambenog objekta izgorjela, ljudskih žrtava nije bilo**

## ZBOG POŽARA OSTALI BEZ KROVA NAD GLAVOM, PRONAĐEN PRIVREMENI SMJEŠTAJ

U ilidžanskom naselju Stup u požaru koji se desio 4. marta izgorjela je većina stambenog objekta u ulici Vitomira Lukića 75.

Načelnik Općine Ilidža, Nermin Muzur, odmah je posjetio komšije.

- Obišli smo naše komšije ubrzo nakon što su hrabri vatrogasci ugasili požar. Porodice koje su ostale bez krova nad glavom i koje nemaju alternativni smještaj prihvaćene su u naselju Osjek, tačnije u prostorijama VD Ilidža, a osigurana im je hrana, te topla odjeća i obuća - rekao je Muzur, te se uz pohvale vatrogascima na brzou i efikasnoj reakciji, zahvalio i pripadnicima Crvenog križa Ilidža koji su osigurali hranu, odjeću i obuću za 20ak osoba.

humanost i posvećenost prilikom akcija potrage i spašavanja u Turskoj.

Pripadnici GSS Ilidža i FUCZ bili su dio bosanskohercegovačkog tima koji je iz ruševina u Turskoj spasio 26 osoba, što najbolje govori o njihovom radu. Prema zvaničnim informacijama turskih vlasti spasioci iz naše zemlje bili su drugi najuspješniji, odmah iza spasilaca iz Azerbejdžana.

- U budućnosti definitivno moramo razmisliti kako da se ophodimo prema ovim ljudima, njihovom statusu i esencijalnosti za našu lokalnu zajednicu, ali i za angažmane kakav su imali u Turskoj -

naglasio je načelnik Općine Ilidža.

Načelnik Muzur zahvalio se članovima GSS Ilidža i FUCZ za angažman i pruženu pomoć stanovništvu prilikom poplava koje su krajem 2021. godine pogodile Ilidžu.



Brza intervencija vatrogasaca



Projekti vodosnabdijevanja spadaju među najvažnije infrastrukturne projekte za Općinu Ilidža

## GRADI SE PUMPNA STANICA BLAŽUJ



Rezervoar Blažuj je jedan od najvećih u KS

Projekti vodosnabdijevanja su najvažniji infrastrukturni projekti za Općinu Ilidža.

Iako građevinska sezona još nije ni počela, krenuli su radovi na pumpnoj stanici Blažuj.

**Poginuo u akciji izuzimanja MTS-a iz baze Krtelji**



Porodica rahmetli Hajrudina Klepe

## 31. GODIŠNJICA: SJEĆANJE NA HAJRUDINA KLEPU

Učenjem Fatihe i polaganjem cvijeća u Butmiru i Donjem Kotorcu delegacija Općine Ilidža predvođena predsjedavajućim Općinskog vijeća Ilidža Tarikom Stambolićem i njegovim zamjenicima, Redžom Lemezanom i Selverom Zečirovićem, obilježila je 31. godišnjicu od pogibije Hajrudina Klepe.

U organizaciji Udruženja boraca Bosnae Zelene beretke Ilidža počast rahmetli Hajrudinu Klepi odali su i članovi njegove porodice, prijatelji, saborci i predstavnici boračkih udruženja.

Hajrudin Klepo se među prvima uključio u akciju izuzimanja oružja i MTS-a iz Krtelja, koja je 1992. godine bila baza Specijalne jedinice policije Ministarstva unutrašnjih poslova Republike Bosne i Hercegovine.

U pokušaju da osposobi transporter, Klepo je poginuo od snajperskog hica.

Inače, operacija izuzimanja oružja iz Krtelja u kojoj je poginuo Klepo, počela je nakon što je pokojni Emil Gavranović - Beban, Butmiranin i pripadnik Specijalne jedinice MUP-a RBiH, svojim komšijama prosljedio poruku "Krtelji su slobodni, ko prije curi njegova je".

Po završetku radova ova pumpna stanica će u budućnosti značajno olakšati i poboljšati vodoopskrbu za domaćinstva u ovom dijelu naše Ilidže. Ovo je samo jedan od projekata koji se tiču obnove stare i izgradnju nove vodovodne, ali i kanalizacione mreže - rekao je načelnik Općine Ilidža.

Inače, rezervoar Blažuj jedan je od najvećih na području Ilidže, ali i Kantona Sarajevo. Od nove pumpne stanice u Blažuju neće profitirati samo domaćinstva u mjesnim zajednicama Blažuj i Osjek, već će ona napajati i kompletno područje RP Riverina-Sastavci, ali kao i Ahatoviće i Dobroševiče, naselja koja se nalaze na teritoriji općine Novi Grad.

U proteklom periodu okončani su radovi na izgradnji prve faze kolektora za Rakovicu u dužini od 800 metara, a izvode se radovi na izgradnji kanalizacione mreže u naselju Osjek (Hendekuša), dok se u potpunosti obnavlja i kanalizaciona mreža u naselju Butmir.

**Održavanje vodotoka na području općine Ilidža**

## UTVRĐEN DIO OBALE DOBRINJE, OČIŠĆEN RAKOVIČKI POTOK

Sezona čišćenja i održavanja vodotoka i rječnih korita na Ilidži skoro da i ne postoji zbog konstantnih i čestih radova koje provodi JP Ilidža.

Nakon sanacije obale i čišćenja jednog dijela rijeke Dobrinje, s početkom proljeća očišćen je i Rakovički potok, koji je u prošlosti poslije obilnih kiša znao uzrokovati probleme stanovništvu Rakovice.

Želja Općine Ilidža je kroz redovne akcije čišćenja izbjeći scene kakvima smo svjedočili krajem 2021. godine.

Manje smeća u rijekama i vodotocima znači i bolji protok vode i manju mogućnost njihovog izlivanja. Vjerujem da ćemo u budućnosti promijeniti naš odnos prema vodotocima u našoj lokalnoj zajednici, jer oni nisu mjesta za odlaganje bilo kakvog smeća.



Manje smeća u vodotocima znači i bolji protok

**Privremeni alternativni smještaj za romske porodice u Rakovici**

## MOBILNA UČIONICA ZA ROMSKU DJECU



Gazmendu Januziju, višem referentu za saradnju s nacionalnim manjinama u Kantonalnom centru za socijalni rad.

Postavljanje mobilne učionice kao prostora za pripremu za školu izuzetno je važan korak u našem nastojanju Općine Ilidža i načelnika Muzura da romska djeca dobiju priliku da se na adekvatan način školuju i stiču nova znanja.

- Zadovoljstvo koje sam imao priliku vidjeti kod djece, njihov odnos prema socijalnoj radnici Saneli Baljak, zaista je pokazatelj da trebamo nastaviti rad na konstantnom poboljšanju uslova za romske porodice koje su izmještene sa lokaliteta nekadašnje Šumarske škole iz nulte vodozaštitne zone - rekao je načelnik Muzur, te dodao:

- Uz mobilnu učionicu, novi električni priključci tek su jedan korak u pravcu kojim želimo ići u budućnosti, nadamo se da ćemo na tom putu zajedno koračati s našim komšijama Romima.

Ključeve mobilne učionice, koja je postavljena u Rakovici, na lokalitetu gdje je smješten i privremeni alternativni smještaj za romske porodice, načelnik Općine Ilidža Nermin Muzur uručio je

**Nastavak uspješne saradnje Općine Ilidža i IOM-a na području Mjesne zajednice Blažuj**

## OBNOVLJENI POTPUTNJAK I RASVJETA

Kroz nastavak uspješne saradnje s IOM-om na području Mjesne zajednice Blažuj obnovljen je potputnjak u neposrednoj blizini Sedme osnovne škole, koji je u prošlosti često plavio i tako predstavljao ozbiljan problem stanovništvu. Nova rasvjeta, dvije crpne pumpe i nadzorne kamere, koje će biti povezane na videonadzor škole, itekako će doprinijeti sigurnosti učenika, ali i svih stanovnika ovog dijela općine Ilidže.

Osim radova na potputnjaku, instalirano je 139 novih LED svjetiljki, a na području Mjesne zajednice Blažuj postavljeno je 57 novih stubova za rasvjetu.

Nakon što je prethodno podijeljeno 70 setova kanti za dvolinijski odvoz smeća, u narednom periodu trebao bi biti urađen trotoar u ulici Kamenolom, u dužini od 310 metara.



**Iako građevinska sezona još kako treba nije ni počela**

## NOVI IZGLED ILIDŽANSKIH ULICA: SABITA UŽIČANINA I 15. MAJ DOBILE I NOVI PARKING



Ilidžanske ulice Sabita Užičanina i 15. maj poprimile su posve novi izgled nakon što je završeno asfaltiranje.

Kroz radove na obnovi ove dvije saobraćajnice izgrađeni su i dodatni prostori za parking, a uređene su i nove pješačke staze te je ocrтана horizontalna signalizacija.

U narednom periodu u pomenutim ulicama bit će obnovljena i ulična rasvjeta, a bit će uređen i zeleni pojas uz pješačke staze i zasađena nova stabla.

- Iako građevinska sezona još nije kako treba ni počela uspjeti smo uraditi jedan ozbiljan projekt, na šta smo izuzetno ponosni - rekao je načelnik Općine Ilidža Nermin Muzur.

Načelnik je naglasio kako i ove građevinske sezone očekuje da će Ilidža biti pravo gradilište, mada je, kako kaže, to već vidljivo.

Centralni dio Ilidže poprimit će posve novi izgled


## POČELO POPLOČAVANJE CENTRALNOG TRGA



Radovi se odvijaju ustaljenom dinamikom

Poslije uklanjanja svega što je narušavalo izgled budućeg Centralnog trga na Ilidži, a potom i detaljne pripreme samog terena za finalne radove, počelo je postavljanje ploča koje će biti sastavni dio prostora između Prve osnovne škole i Četvrtne gimnazije.

### Ilidža ugostila veliko međunarodno takmičenje



Nastupilo 112 najboljih takmičara

## EP U21 U STONOM TENISU ODRŽANO NA NAŠOJ ILIDŽI

Na Ilidži je početkom aprila održano Evropsko prvenstvo do 21 godine u stonom tenisu, a na kojem je nastupilo 112 najboljih takmičara u obje konkurencije, dublu i mješovitom dublu iz 32 države.

Organizacija ovog velikog takmičenja povjerena je Stolnoteniskom savezu Bosne i Hercegovine, a održano je u hotelu "Hills" na Ilidži. Ovo je bio prvi put da se u Bosni i Hercegovini održalo EP do 21 godine u stonom tenisu. Po jačini ono je drugo prvenstvo u Evropi i od njega je po rejtingu veće samo seniorsko prvenstvo Evrope.

Nermin Muzur, načelnik Općine Ilidža, koja je pružila podršku organizaciji, posjetio je goste iz Evrope prvog dana takmičenja.

- Drago nam je da je općina Ilidža, kada je u pitanju i stoni tenis, bila domaćin jednom ovako velikom takmičenju. U zadnjih nekoliko godina općina Ilidža je postala centar sportskih dešavanja, kako u Kantonu Sarajevo, tako i BiH. Nadam se da će tako biti i u budućnosti - naglasio je Muzur, te dodao:

- Da je stoni tenis sve popularniji na našoj općini svjedoči i amaterska liga u stonom tenisu koja se igra od ove godine.

Iako je prethodna faza pripreme poprilično potrajala, načelnik Općine Ilidža Nermin Muzur zadovoljan je jer su radovi na popločavanju trga uveliko krenuli.

- Centralni dio Ilidže konačno će početi da poprima izgled kakav naši građani zaslužuju. Na ovaj način potvrđujemo našu opredijeljenost da stanovnicima Ilidže podarimo jedan od najljepših i najvećih trgova u Kantonu Sarajevo, a siguran sam i u Bosni i Hercegovini - kazao je načelnik Općine Ilidža Nermin Muzur.

Osim što će drastično promijeniti izgled centralnog dijela Ilidže, novi trg će nuditi i mogućnosti za brojne velike kulturne, zabavne i sportske manifestacije.

Naravno, od njegove izgradnje korist će imati svi građani i posjetioци Ilidže, no to će posebno osjetiti učenici škola koje su svojevrsni "domaćini" ovog trga.

### Program koji Općina Ilidža redovno realizuje

## SIMBOLIČNA NOVČANA POMOĆ ZA OSOBE STARIJE OD 80 GODINA

Načelnik Općine Ilidža, Nermin Muzur, obišao je građanke i građane Ilidže starije od 80 godina, te im uručio simboličnu novčanu pomoć.

Za ovaj program, koji Općina Ilidža realizuje putem Službe za koordinaciju rada mjesnih zajednica, izdvojeno je ukupno 213.000 KM. Od 2.130 stanovnika Ilidže starijih od 80 godina, načelnik Muzur je pojedine lično posjetio, te saslušao njihove želje i potrebe.

- Nastojimo, koliko god smo u mogućnosti, da mislimo na sve naše sugrađane. Posebno želimo pomoći starijim osobama, koje su kroz svoj životni i radni vijek aktivno doprinosile razvoju naše lokalne zajednice - kazao je načelnik Muzur, te dodao:

- Iznenadila me pozitivna energija ovih ljudi iako su u trećoj životnoj dobi. Od njih se definitivno ima šta čuti i naučiti.

Načelnik Muzur je naglasio kako će Općina Ilidža i u budućnosti nastojati da na slične načine iskaže senzibilitet prema svim građanima Ilidže.



Izdvojeno je ukupno 213.200 KM



**Osnovna škola  
Stup**



**Tramvajska pruga  
Ilidža - Hrasnica**



**Sportska dvorana  
Hrasnica**



**Veliki  
park**




**Termalni  
bazeni**



**Sportsko-rekreacioni  
centar za djecu i mlade**



**Trg  
"Sabit Hadžić"**



**Kružni tok  
"Idu dani"**




**Uređenje centralnog  
dijela Ilidže**



**Ratni put  
preko Igmana**



**Rekonstrukcija  
Stojčevca**



**Obnova  
premijera**

